

Temp per ponderar l'avegnir da la pressa rumantscha

Intervenziun parlamentara d'Aurelio Casanova

■ (anr/fa) Sche la chasa editura Somedia SA na survegn proxim onn betg ulteriurs 300 000 francs chala ella dad edir La Quotidiana. Aurelio Casanova e 59 collegas deputads dumondan la regenza tge ch'il chantun pudess far.

Durant il mais mars da quest onn, mo trais dis suenter las festivitads per il giubileum da 20 onns da La Quotidiana (LQ) e l'Agentura da novitads rumantscha (anr), ha la Somedia SA suttaless a l'anr ina dumonda per sustegn finanziel per pudair cuntinuar ad edir LQ. «Al medem mument ha la Somedia communitgà ch'ella surprendia ils deficits da LQ mo pli fin la fin da l'onn 2017», legian ins en la dumonda che Aurelio Casanova (pcd, Glion) e 59 ulteriuras deputadas e deputads al cussegl grond han inoltrà ier a la regenza grischuna. I sa tractia concretain da custs betg cuvrids da persunal ed onuraris per l'import da 300 000 francs per onn, hai num plinavant. La Lia Rumantscha e l'anr na vegnan a l'avis dals deputads che han suttascriet la dumonda betg a pudair finanziar quest import, i saja incontestà che la finanziaziun saja mo pussaivla cun ulteriuras contribuziuns chantunales e federalas: «Uschia pudess LQ, che ha oz var 4000 abunents, vegnir mantegnida per ils proxims onns.»

Ulteriur sustegn finanziel dal maun public?

«Nus dumandain la regenza sch'ella è era da l'avis che la fin da l'unica gasetta dal di rumantscha avess consequenzas fatalas per l'avegnir dal rumantsch, surtut ord vista dal mantegniment e la promoziun da la lingua», declera Casanova.

Enpli dumondan el e ses 59 collegas sche la regenza saja pronta da collavurar per chattar ina soluziun e da porscher maun era da maniera finanziela. «Tge pussaivladads vesa la regenza per procurar a curta vista, ensemen cun la confederaziun, per ulteriurs meds finanziariels per ils onns 2018–2020?» El haja inoltrà questa dumonda perquai ch'il rumantsch al stettia ferm a cor, questa lingua saja però periclitada, perquai dovria ella sustegn, ha ditg Casanova, «cun Radio e Televisiun Rumantscha avain nus ferms meds d'infurmaziun rumantschs, e per avair il pled rumantsch er en scrit èn LQ e l'anr in bun med.» El è persuas che sche LQ moria a la fin da l'onn, «alura è ella morta per adina». Ins dovria in pau temp per ponderar l'avegnir da la pressa rumantscha, ha menziunà Casanova, «per avair la peda necessaria per far quai sto LQ restar anc in fin dus onns.»

Sustegn da la gronda part dals deputads rumantschs

Filip Dosch (pcd, Surses) presidescha la fracziun rumantscha dal cussegl grond: «Jau pens che la gronda part da nossa gruppa rumantscha sustegnna da princip l'intent da mantegnair La Quotidiana.» Dals 60 deputads che han suttascriet la dumonda Casanova èn ina gronda part da lingua rumantscha e da lingua taliana. «I dovra uss in'aziun da salvament per avair in zic temp per guardar co ch'i duess ir vinavant cun la pressa rumantscha», ha ditg era Dosch, «sch'ins guarda vers il futur vesan ins ch'ils meds stampads vegnan adina pli ferm sut squitsch ed ils meds digitalis vegnan a surprendre probablain la funcziun da las gasettas.» Perquai èsi a ses avis «fitg impurtant da far in'analisi pli profunda per savair tge ch'i pudess schabegiar a media ed a lunga vista cun la pressa rumantscha.»

Er il Grischun talian ha quitads

Al medem mument sco Aurelio Casanova ha inoltrà er il deputà Manuel Atanes da San Vittore (ps, Roveredo) ina interpellaziun. El menziuna che la ordinaziun federala davart radio e televisiun pegiureschia anc «la situaziun precara da differents meds d'infurmaziun dal Grischun talian». El numna qua p. ex. «La Voce del San Bernardino», ma er ils schurnals online «ilmoesanno.ch» e «labregaglia.ch» e scriva ch'ils meds d'infurmaziun en Val Poeschiavo survivan era mo grazia a la lavur instancabla da numerus voluntaris. Atanes dumonda la regenza sch'ella saja era da l'avis ch'il Grischun talian duessia era pudair sa laschar infurmar da meds da massa en lingua taliana che rapportan davart quai che schabegia en las regions al sid dal Grischun ed en il chantun sez. «Qualas pussaivladads vesa la regenza per sustegnair bainbaud era finanzielmain ils meds da massa dal Grischun talian ch'èn en difficultad?»



Aurelio Casanova (pcd Foppa) e 59 ulteriurs deputads s'engaschan per il mantegniment da La Quotidiana.

FOTO Y. BÜRKL